

Maneho bergonzoso di Ministro ta pone cu 17 Arubiano ta sin trabao!

Gobierno ta boycott operadornan nobo di casino?

ORANJESTAD (AAN): Ta kico ta pasando den Gobierno di Aruba? Pa motibo di un maneho 'misterioso', e Pasco aki no menos cu 17 tata di famia lo ta sin trabao. Ademas di esey, Gobierno mes lo ta perdiendo hopi placa, cantidad di turista ta malcontento, y turismo en general ta hayando un berguenza.

Algo ta pasando, cu Ministro di Turismo te ainda no kier duna permiso di operacion pa un Operador Nobo di e casino den Aruba Grand Beach Resort.

Manera ta conoci, na momento cu Casino Masquerade a cera debi na problemanan cu Thunderbird Gaming, inmediatamente e Hotel a haya oferta di e grupo "Sunny Group" pa bin opera e Casino aki na Aruba.

Sunny Group ta procedente di un pais Africano, y nan tin cantidad di Casino chikito operando na Africa y den Caribe, e.o. Trinidad & To-

bago, St. Kitts and Nevis, Antigua, Barbados, y South Africa.

DIARIO a compronde cu Sunny Group ta uno cu ta inverti den Casinonan chikito, y alavez ta haci hopi uso di recursionan humano di e isla mes. Pues nan no ta yena avionnan yen di 'ehecutivo' cu ta bin Aruba pa traha.

Ora cu Sunny Group a acudi na Gobierno cu e peticion pa haya permiso di operacion, sorprendentemente a bin tende cu tin di bay "screen" prome e operadornan.

TRES SIMAN YA A PASA

Increible pero berdad! Ya caba mas cu 3 siman a pasa, y ainda nada. Ta con hopi Gobierno aki tin di warda pa keda cla cu screening? Acaso ta te na Planeta Marte Gobierno kier bay busca informacion?

Informacion y background check ta facil pa haya di e hendenan aki. Gobierno mester djis lanta telefon y yama Interpol pa busca informacion, y lo obtene esaki dentro

di 2 pa 3 dia.

Pero ta puro berguenza cu Gobierno ta wantando 3 siman caba cu e 'screening'. Ta parce cu Aruba a caba di inventa un Ministerio Anti-Turismo! Pa e motibo aki, no menos cu 17 tata di famia ta riba caya e Pasco aki. Tanten cu Sunny Group no haya permiso, nan no por labora!

Pa haya confirmacion riba esaki, DIARIO a contact Richard Velasco di Aruba Grand Beach Resort y el a confirma e hecho aki. E tambe ta lamenta profundamente cu Gobierno ta wantando asina hopi cu e permiso aki.

Aparentemente e Resort aki tambe a haci nan propio screening via canalnan internacional, y a haya esey den menos di 4 dia. Tur cos ta musta OK, y pesey nan no ta compronde di con Gobierno ta wantando asina hopi.

Velasco a splica na DIARIO, cu esaki ta creando un domino-effect tambe riba su Hotel! Ya caba diariamente e mester pidi disculpa

na huespednan, cu e Casino ta cera. E ta ofreciendo nan cantidad di descuento, y hasta cena gratis. Tur esaki ta pone e Hotel perde placa.

Lo mas tristo, segun Velasco, ta e diessiete empleadonan cu lo ta sin trabao durante Pasco. El a subraya e bunita hecho si, cu recientemente Sunny Group riba su propio voluntad a regala 500 Florin pa famia na e trahadornan, como tambe 50 Florin pa cada yiu.

"Sunny Group a haci e gesto aki, sin cu nan a haya permiso mes pa operacion. E ta un hecho sumamente impresionante cu e trahadornan a keda sumamente agradeci na dje," Velasco a indica.

El a splica cu unavez a ripara cu e 'screening' ta tardando asina hopi, a pidi Ministro Beke si acaso e por duna un permiso temporario (permiso condicional) pa Sunny Group habri e Casino e dianan aki, pa asina e trahadornan tin entrada.

Ministro Beke simplemente a bisa: "No!"

E solo decision aki, nifica cu 17 trahador lo pasa Pasco sin empleo, Gobierno lo ta perdiendo miles di Florin riba 'droptax', Gobierno lo ta perdiendo placa tambe di Loonbelasting, y Gobierno lo ta perdiendo placa tambe di Inkomstenbelasting!

Un observador a indica na DIARIO, cu si bo analisa e situacion aki, ta parce comosifuera Gobierno ta boycott e Casino aki.

Tur esaki nifica, cu e Casino nobo lo bay habri pues te otro aña! "It is a shameful thing," Richard Velasco a indica na DIARIO.

Ademas di esaki, DIARIO a compronde cu Sindicato FTA tambe ta na altura y no ta compronde di con Ministro ta tardando asina hopi. Turismo en general tambe ta worde afecta tanten cu portanan di e Casino keda cera.

DIARIO ta spera cu Ministro lo haci algo rapido pa asina porfin e diessiete empleadonan, y turistanan sa di goza di un bon dianan di fiesta.

Tur dos MD-90 lo ta bulando!

Air Aruba bulando awor cu cinco avion

ORANJESTAD (AAN): Ayer tardi e avion MD-90 nobo di Air Aruba, a lanta vuelo pa asina cuminsa yuda e aerolinea den su itinerario di Noordoost di Merca. Di e forma aki, e avion "Teishi" ta aumenta e capacidad di pasahero pa trece mas turista pa e isla aki.

DIARIO a compronde cu awe Diaranzon, e segundo MD-90, esta "Garza Blanco" lo lanta vuelo tambe.

Tur esaki nifica cu e certificacionnan di parti Federal Aviation Administration a keda cla, y e avionnan aki por bula pa Merca.

Entrante awe, por bisa cu Air Aruba ta contando atrobe cu 5 avion. Nan ta dos MD-90, dos MD-88, y un DC-9.

Tur esaki nifica, cu lo cuminsa bula atrobe pa Baltimore y Philadelphia, y lo aumenta frecuencia di vuelo pa Newark cu dos mas. Tambe lo aumenta e frecuencia di vuelo di Aruba pa Colombia.

SANTA CLAUS TA PA TERA FRIEU!!

